



王考功鷓適軒文集卷之三

益津王樂善存初甫著



伯子伯鏞大聲甫

門人于成龍雲從甫同校

文

祈雨告城隍文

惟 帝降嘉種以育兆民惟 神奉 明命以蕃

百物禦災捍患于職司有常春祈秋報在秩祀無

斁昔在有商厥臣伊尹其靈明昭著字格玄明固

未能如神也然一夫不獲若已內之溝中而伐
夏救民不辭戎馬之勤今歲雨澤愆期亢陽為患
歷春徂夏既已無麥矣仲夏以來雖靈雨三霑然
四郊固未洽也禾之方者苞者日就卒瘁而龜坼
旱乾種不可布又將無黍稷矣夫九夏長物之府
此而不長尚烏所待長六月大雨時行之期此而
不雨尚烏所望雨雨不降物不蕃物不蕃民無食
矣寧獨民將上帝百神之明齊國家九賦之
正共亦罔有攸賴此固下民自作之所致然竊意

災疫流行諒已取其殘以彰天討矣此二三餘
黎神寧忍使無子遺耶曰者聖天子抱雲漢
之憂下明詔靡神不舉神獨不聞耶抑某等
積愆多戾宜薄罰之俾際是耶昔盖有自暴而請
決獄而致隨車而注者某等念不及是惟是今之
民所瞻依惟神所利賴惟神所可控訴亦惟
神神不一垂恤而拯救之誰復有垂恤而拯救
之者某等雖無長人之責然黍齊民之首方且釋
事在田力耕百畝以給公家而供伏臘顧德薄

誠微無緣上干 帝閭謹率同鄉之人貢忱輸悰
仰瀆 洪聽伏惟 俯察民隱仰達 天庭發鬱
陰于崇墉延太和于冲漠殛旱魃于易水起伏龍
于重淵霈三日之霖甦四郊之困普 上帝好生
之德答 天子側席之虔造 某等下民無疆之命
俯伏皈誠不勝戰悚祈祝之至

檄河神文

敬告 大河河伯暨司風司水之神 不似北鄙之
人陵衍居而車馬游然竊高大神之威靈貽響大

矣無感不應有祈必獲惟是 國家之崇報惟虔

惟是小民之駿奔對越亦惟虔今 天子有股肱

之臣大學士 某請 告歸其鄉 天子禮重元僚

愛深一體特命使臣護行 聖意若曰長途溽暑

其嚴干揶戒舟楫俾無虞于利涉使臣受命飲冰

肅將惟謹豈大學士之名位是趨惟是 天子之

明命不敢弁髦也白河以南汶水以北翕然安瀾

宵行若晝獨自涉神之境于茲八日矣乃無日不

風者及今將出神之疆不過一舍矣乃風濤大作

若鳴若暗若叱若咤一似有大怒然者夫 天子
念元輔而遣使臣以衛其疾神何故驚之 天子
念長途而遣使臣以輔其行神何故遮之徐州之
謁告將微誠不足以動而俚言不足以達乎則常
事不廢凡茲下民實耳而目之而今若此是神有
不應之感不報之祈也得無示下民以皇惑乎且
將以風雨之變出于偶然非神所為乎則未有疾
風過雨斷虹鬱雲連數日不解者將以風雨之柄
自有司存非神所及乎則反風分風自昔侈為美

談神之力非不足者將以不如此不足以警北鄙
平土之人而堅其信心乎然少習典章頗窺神道
數日以來亦既驚伏而震懾于神之明靈矣怒不
可過威不可褻 天地之道七日来復 不似將
天子明命而來不敢不以 天子德意干瀆明聽
謹此再申播告惟 神其明鑒之

賀劉端峯年伯壽文

蓋聞五嶽奠坤維而首兩界者獨推宗於玄圃長
江紀南國而頌委潤者必歸德於大岷豈非以秀

有自鍾祥有由發莢有從著盛有繇彰耶故步仞
之丘尠棟樑之植霖雨之物非泔潦之有而蒲柳
之質無金石之堅也然豐歉短長之算握之維玄
乘除違會之機來也莫喻或假服鍊以登年而外
食於班猛或用標鹿以永曆而享之夫神駒或躋
鼎盛以壽康而評輕於月旦若然者即黃耆嬰色
與殤子何殊雖巖廊大耄於里耄奚擇何也凝福
無基倖成而傾圯也易定命非厚苟金而衍續也
難此橋運之故然實人理之定則也而後乃今有

得於 端翁劉老年伯云翁承長厚之訓奕葉襲
其素封服勤儉之條箕裘振其玄業神姿散朗冠
冕人倫濬賞清令領袖後進鳩車機警裴司空之
神明綺歲岐嶷柳侍中之藻煜芹泮一遊名先衆
彥棘圍四入退仍六飛惟五石瓠失慮於浮江湖
故不龜手僅施於泝泝統乃翁超然霞表邈矣懷
中卷孔櫝之大璧詒之五常撫謝砌之瓊枝修以
三物彬彬蘭茁里是高陽蠹蠹桂芳門真通德春
融鯤浪蒸雲而先躍一龍花滿上林登瀛而遂參

三俊吉祥善事繁翁所自求緝熙純嘏於翁無兩
儷然且未滿先挹履高而卑居已顯晦之間適情
夷惠之介冥心恬愉之境栖身道義之場雲霞瑩
其精神淵嶽澄其衷曲胞與擴其襟宇光霽暢其
性靈誦抗志於孔鮒則笑主父五鼎之歎慕樂志
於長統則哂寧戚長夜之歌詠勵志於茂先則誚
孫弘十上之陋觀魯訓於禽父則譏干木驕人之
談榆陰接翠高卧羲皇棣萼交輝式和琴瑟高蹈
塵埜之表長嘯洪羨之前專精神健眠食以康伯

氏於進思訓步畔謹租庸以篤外臣之分守辟則
崑崙高峙於崇望之外而五嶽擁坤軸以柱輕霄
大岷靜鎮於井絡之墟而長江經亥步以流元化
不有此翁焉取此子前作後述振古如茲且也雲
達高漸羽儀當朝帝車中懸斡旋七政儻所謂無
用之用用乃不窮無為而成成斯不朽者耶由斯
杖鄉由斯杖國進而五豆進而期頤常珍在庭
褒綸在櫝公衮在御玉鳩在扶鳳毛麟定倍今日
之捧擁者十百其儷戴恩誦德由世講而宇下者

億兆其詞將使黃伏謝豔園綺遜延彭臍推其後
祿羨門慚其自然在翁特分內之固然在天亦覺
報之常典則今日之祝始基之矣正月十七日寔
翁弧辰於是翁行艾矣二三子托交伯君仰戴扮
陰者幸遭翁之大慶而樂睹翁之有倣也相率就
伯君稱觴遙祝而授簡於不似擇言俯舉顧不似
對衡接宇居幸庶幾闡燬揚休遂忘固陋若云勅
此左券徐徵黔羸云

詞

賀郡伯趙公薦詞有引

伏以 聖天子承乾求莫須守牧以宣猷賢使者
行部觀風舉循良以報命惟名實之加上下斯褒
薦之來再三慶藹章縫歡騰黎庶恭惟 郡伯趙
公命世上賢斯民先覺正氣孕萊山之秀蠹萬丈
以巖巖英標鍾危宿之精麗三台而磊磊詩禮得
趨庭之正脉擅文獻于東方文章衍華國之真傳
播聲于北斗揀天高雲霄閥拔地起湖海樓搏扶
搖息六月以南覽德輝翔千仞而下製錦功成于

花縣價重銓衡飛旌 綸召于楓宸望隆臺省行
爰立于貳公之上聊歷試于三輔之間陽知應律
滿檀陽謾道憇棠之慕甘雨隨車盈霸州又聞來
暮之歌兩地春同九里河潤恢乎游刃鋒穎如新
沛然解絃瘡痍盡起持身冰凜追廣南酌水之清
風正色霜飛接穎上如神之芳躅塞淵惠下桑田
戴惠日以嬉遊色笑作人芹藻對薰風而樂育莫
金烟霽移來琴鶴高寒玉帶波澄洗出劔刀清淨
聲稱赫赫布滿閭閻薦瓠琅琅屢聞殿陛曰剛貞

曰敏廓曰雅多善政甘棠化日之目儼如肖貌之
真謂溫厚謂高明謂更著賢聲春陽秋水之評允
協口碑之頌明揚伊始崇陟有期某與躋熙臺幸
沐銀莢之大澤恭逢盛事快瞻 斧宸之芳名桑
麻深燕雀成感臆更深于逢掖贊乾坤繪日月懽
悰莫罄于織毫竊奏巴歛私先太常而勒帛用昭
輿誦佇看褒德之開封

海岱濟川雅望包黃掩卓襦袴萬家春曉小試
經綸學○不言桃李自成蹊當道褒揚數准擬

重膺 環召喜華堦高擢

賀郡伯錢公薦詞有引

當宁重股肱之郡 紫泥簡畀 時髦輶軒舉耳

目之司白簡明揚 民譽薦剡與歡聲共暢英名

與茂實俱孚恭惟 郡伯錢公粹量淵渟英姿山

立造深閩奧探理窟之淵源學擅精華契聖心之

筆削靈懷了澈瞠乎游夏若是乎班彩筆翩翩沛

然江河莫之能禦廓洞庭以為畜派會九流闢委

宛以出竒名高五總樹赤幟于三江之表凜急疾

而無前奮青雲于一飛之初搏扶搖而直上旋覽

德翔千仞而下遂培風息六月以南製錦初成春

滿鏡湖芳草色易符歷試風和曹邑碧梧陰適荒

城正急于需賢乃 朝論共推于奏最遂從鳧舄

明陟熊轡蓋兩地瘡痍之衆已息于撫摩故三輔

寬大之條重資于宣布朱轡皂蓋邁東方千騎之

威儀龍節虎符作南伯列城之表率恢恢游刃當

髀髀肯綮而鋒穎如新噦噦鳴鸞就熟路輕車而

驟駢若舞精神秋水蜚銀菟之英聲談笑春風掃

蒼鷹之苛習春回東閣花明北海之尊韋佩西門
蒲作南陽之杖仁心為質一境咸躋熙臺佚道使
民三輔獨高冬日轟崇臺之岌業屹然增重金湯
滌堯庫之煩猥肅矣同休琴鶴晝簾日永品題徧
賜山川鈴閣風和膏馥普沾蒙部卧花陰之蹇足
更鼓分明菱棠樹之鳴騶桑麻森鬱歌騰來暮卓
為列城二千石之允轂捧觀風遂達 九重十二
旒之聽共理既推于高第就拜佇履乎元台諸與
瞻依一新愉忭維茲髦俊尤倍尋常某涉世才疎

承家學淺暴茅簷之日欣時接乎塵談賡蘭臺之
風窘莫追于筆陣遡靈源而漱潤幸沾九里之餘
覩大厦之聿崇與有千間之慶高侯封于一識懽
悰寧後青衿附輿誦于兩岐俚調聊紓丹臆

霸臺春色融融遍阡陌白叟黃童都似當年懽
歌帝力共說家家沾濺澤得受用煖衣飽食天
賜與吳越王孫海虞仙客○無捐瘞安衽席風
搖搖兩滴滴喜百里熙臺真箇是華胥樂國屈
指古循良似使君怎能多得指日見 御屏丹

詔傳消息

右調帝臺春

解

○至游齋解

存初子從游京邸闢一室于廳事之左因其故而
 加掃除焉負震面允西南其戶合其橫以為縱截
 長補短不盈丈而止北壁下設一木榻左峙小几
 戴瓦爐右一案當牖下筆硯具一几一度依南壁
 北向儲古今書數種存初子曰徜徉其中而顏其
 楣曰至哉游客有過者顧笑謂子誕矣室陋如斗

前偈如衙其于以偃息而稱游詭其及陋而謂至
 是榆枋之見而埽井之誇也子誕矣存初子曰唯
 唯否否夫以茫茫天壤之中而有此都邑于擾擾
 都邑之中而有此第于款款西第之中而有此室
 主人者復日鍵關謝客便便然卧也誠不可語游
 而稱至然世之所謂游者笙歌杯竿叫囂于亭館
 為溷而已瘦筇短屐跋涉于榛莽為翫而已風舟
 雨槩沿洄于蕪葭為擾而已顧游于山則紆徐之
 適詘游于水而眺望之樂微游于絲竹管弦而山

水之趣失蓋不可兼得也以吾茲室誠陋然時而披九經之籍則爽塏弘肆之觀陳時而詠左馬之編則瑰麗竒詭之景出時而玩時彥之製則窈窕纖巧之玩列時而引名山之記則綿邈幽曠之思橫且也朝日返映虛牖流輝虛崑平浦之明遠也大厦前屏赫曦息熘深樾窈洞之幽邃也前除虛洞清飈自生空谷陰峽之清爽也不跋涉而曠朗不舟楫而便適不亭館絃歌而娛耳厭目之資應接不暇以騷人游子所為繭足殫力瘁精疲神日求而不可畢攬者吾以方丈之地括而聚之坐而食之夫安知其孰為游乎孰不為游乎孰為至乎孰不為至乎且吾聞至人之游以心為輪以氣為馬以神為御徜徉乎廣莫之野逍遙乎無何有之鄉即吾區區蔭茅而息躬發篋而寄興尤覺夫有待之為煩也而子固少之乎則就莊子休宗少文而質焉也可

傳

郭寧陽傳

郭寧陽公者名某字某其先籍四川宜賓四世祖
龍洪武中以人材守柱下史永樂初削籍徙余郡
遂為郡之某屯人公生而穎異自就外傳即善屬
句矢口而出殆同夙構徃徃驚其座人垂髫以尚
書補博士弟子時郡諸生罕治毛詩而學博陳公
欽者說詩有聲公從授焉暮月而盡得陳公之精
華公既嫻古文詞若五音七聲之學復博綜今昔
獻典里後進執詩若書者麋集門下而郡中文事
亦一切倚毗至者宿徵故實曹史求舊政並無不

亟就公無不得所欲去者甫弱冠廩于學宮五年
而當世廟某歲應選貢游辟雍所交皆海內知名
士復治麟經即海內知名士名能世其經者皆謝
不及顧數奇屢困場屋卒以親老就吏部選領河
南之獲嘉甫四月以內艱去縣服闋補山東之寧
陽寬條教禁誅求與民休息賦長繇邑中曩時歲
為令四易冠服供帳費不貲督賦部臣來例內寬
限金百公一切釐革兩造在庭一言而折徃徃勸
戒之曲者心服即立遣去片楮不罰也或諷以曷

為子孫計者第哦子孫不如我要錢做甚麼子孫
強如我要錢做甚麼之語以應庭中多暇則引庠
彥指授理性經濟之學間從鄉措紳觴詠揚推蓋
內不廢治而外不廢游談居父之督賦使者至責
例賂不得則疏殿公公欣然拂衣篋圖書歸民遮
道號泣追慕不已相與勒擬峴之石以志感公既
幼以筆耕雅不善治家人產又橐裝單不能增飭
田宅歸擁四壁即且治濁酒鮭菜召親友談詩文
徵遺事為樂也不惟忘其官並忘其貧云公性介

直倜儻善善惡惡務在別白為人謀必忠遇人困
必急聞一善必羨服慙愚見一不善必面折申諭
至稔惡怙終者避如蛇蝎往往去之或直斥之以
此以善罵座名顧公雖使酒乎然平生即醕酌不
可支未嘗含糊一字及正人君子也事父母孝少
時家貧無僕婢每晨興必灑掃庭宇滌濯几案栝
捲而後入塾不欲以瑣事貽二尊人及居憂戚易
兼至群從婚嫁有無通之郡監司守相人入折節
翁或載酒相過公延款笑語時雜以悲歌長嘯卒

不以交權故有所關說也嘉靖壬戌卒年裁五十
六耳家不能歛拊身拊棺咸親友資給之公著述
甚富多信手頃刻成之以此稿多佚又卒時二子
俱幼遂益散失十不得一也公卒若干年而庶長
子某補弟子員又若干年而嫡子某始補弟子員
一得公之酒一得公之文又若干年而郡中徵鄉
賢應祀者由縉紳韋布以及氓庶同聲共舉無異
辭云

王生曰寧陽公者余猶及見也公蒼顏莊度儵然

塵表天才淵溥漁獵稱之尤長人倫之鑒家君少
時以鄉邦人物問公第推轂容城元劉公靜修灑
陰明岳公季方及家君敷歷中外咨度前徽竟無
踰兩公者而其在寧陽竒今憲副張公登雲于儔
伍中獨小子不才負公賞識耳歲壬辰晤寧陽周
孝廉某致其父老意詢公家世曰清吏清吏吁去
之餘三十年遺愛如一日也此豈勢力術數所能
要結哉以此傳公兩無愧矣

誄

社友張玄圃茂才誄

萬曆十九年五月二十五日郡文學玄圃張君不
祿訃聞其等傷彌天之永戢悼把袂之無期季劔
虛許牙琴罷奏生芻絮酒愧徐孺之專陳白馬素
車非范卿之遠赴僭援弱翰用寫哀悰勒之素旒
冀闡幽懿云爾

誄曰士無顯晦惟德則彰生順沒寧奚辨彭殤人
亦有言死有不亡猗與玄圃胡遽止此委順謂何
其成也毀錫光謂何而貽之痍嗚呼哀哉嗟君之

質孝友天型無假外鏡自啓中扃神情山鎮風檢
秋澄嗟君之行如玉斯潔謂圓能方在塵不涅高
視俗氛清令孑孑嗚呼哀哉嗟君之學海蓄淵潛
周情孔思提要鉤玄有軼必破無誤不刊嗟君之
文雕龍鸞虎漸窺屈宋已參盲腐句出驚人語堪
成古嗚呼哀哉竟君之造一第何難詞場三駕駿
足中瘴徒齎殺陵未洒王官撫君之業猶有未樹
胡昇之竒胡奪之遽茫茫高天匪愚斯喻嗚呼哀
哉皤皤二人待君以崇偉偉棠枝俟君偕榮稚妻

孺子繫君是併孰是長依而茲中訣顏堂哀纏姜
帷慘結素髮衰祿行道嗚咽嗚呼哀哉鵬兮為沴
龍耶何祥峰摧半陟蘭隕春芳冥冥長夜莫使復
陽仲武無祿相如厄渴人也忌才天復降割妙翰
空存德音罷括嗚呼哀哉里選之始君車欲脂戒
君技癢祝君善願篝燈數語遂爾長辭暨君彌留
信使亟遣靜攝恐妨有懷不歲不謂至斯悔今何
挽嗚呼哀哉英英良友卓有古風人見其表未見
其衷我見其進未見其終詎意斯人而有斯疾撫

孤吊惻刺心酸臆前思未湧後感仍集嗚呼哀哉
盍簪之分義重久要蘭襟暫剖見謂鬼銷矧茲大
歸下壽未遭嗟嗟玄圃而今已矣仰惑橋運俯慨
人理桂醕虛陳九原莫起嗚呼哀哉

贊

康節先生像贊

猗歟堯夫有官不就大隱市朝睥睨宇宙清不絕
俗和非逐臭花竹合圍琴尊左右丰采良霄襟懷
清晝棲息德園徜徉文囿月窟天根居鶉食鷄其

用猶龍匪凡斯觀皇極一班瞠乎其後

張仲蔚贊

漢張仲蔚修道居窮工詩擅博浮譽何榮閉門養
性蒿徑纔通衆人莫識識僅劉龔人之游世石火
風萍幻影易息知己難逢來多去多徒取憧憧閑
中日月逝矣高風

向平贊

向長子平潛心老易貴不如賤死生寧異婚嫁既
畢敕斷家事五嶽徜徉偕我同志大塊茫茫何者

非寄勞勞百年狼貪匏繫達人火觀隨時肆意清
風穆如醒我醉寐

河山硯屏贊

黃河之水天上来積石高揭龍門開委潤飛繞中
書臺毫端真見狂瀾摧銀潢東壁相昭面臨睨墨
海壯觀哉

銘

筆山銘

朱方之鎮截彼龍鳥望壘寰中奇峯幽湫惟茲卷

石具體而小七岫參差五泓靚宵竊比達觀惟名
是表千丈非巨一拳非小案上烟嵐庶幾永寶

右小雁宕

王生好奇類老米一日過都乃得此峯寧崆峒如
錯綺三星煌煌峯椒豉携來屈作中書印案頭十
丈嵐光紫靜對塵衿淨如洗

右三台岩

太古雲玄都雪洞虛明峯截薛鎮文房永無缺

右太古雪

厥何狀宋章甫伊何生本太古今何事筆硯伍黜
而撲意道父

右翠冠

撲而竒謂堯堯耶而豎出鴻濛先其諸苦縣老叟
之玄

右玄髓

近朱者赤近墨者黑濯而省之居然爾白濕而不
污時爾之德慎與圖新君子是則

右白石筆山

龍尾硯銘

虛其心玄其德以守爾黑時而出之文有燁君子
哉養辨於黑

靈壁石魚磬銘

不水游而山孕堅而栗扣斯應詘以辨強名磬君
子則之以嘿勝

香袋銘

其志潔其佩也芳幽谷之章式顧爾縑無俾椒艾
充囊

又銘

有物含章不掩其芳口一不忌將失其藏詎仁寡
吉何用不臧爾煩爾易視此括囊

青陽竹葉扇銘

琅玕一束摩青銅蕭蕭萬玉光玲瓏出入懷袖涼
飈通冷然置我渭川宮火雲如山一洗空庶幾奉
揚君子風來清去酷時汝功時舒時卷用無窮我
銘勒之眷厥躬歲在庚寅夏正中

筆筒銘

道主容德惟重以不動御動老氏所謂當其無乃有用者耶

又

立不搖虛能受翊中書功不有

墓誌銘

晉封君墓誌銘代家君

嗚呼此以里居大夫而城邑城晉太冲翁者墓也翁伯子中丞公某昔治兵關中余承乏行塞獲執鞭弭相周旋時已前聞翁倡義任勞躬為植而城

邑城也盖戶比頌德而憑軾者豎百世城功坊旌之矣越二十年中丞公以翁訃訃余田間且以李中丞狀來徵銘余雖未面翁然習翁伯子又習翁城城事誼不能以不文辭按狀翁諱某字某世洪洞人自其上世多義舉得里中稱至元城公始以儒術顯翁元城公長子也始王父東野公夢蛟出其身而翁生生而母李宜人早世自其少時即能承事元城公尤善事繼母樊也和顏順志左右無方有內史浣滌廁之風元城公嘗病結翁籲天請

代已手探下之病竟不病人皆以為孝感既以世業補弟子員每試輒冠因為諸生祭酒執經請益者傾國歲庚子鄉舉魁其經九上禮闈不偶遂用選人高等拜守和陽甫下車即究宿蠹浮冗而清滌之蠲逋墾荒流移雲附獄無大小必以情賦無多寡必以額吏胥無所上下其手公餘前諸生為闡正學剖經旨室不能娶者田不能生者拔當貢而被誣不能自白者蒞政之明年旱翁布衣步禱三日兩大澍止其封內和人異之有成我子弟賜

我耕耘之謠在和若干年擢郎計部民挽留不可得相率勒石志思祠之名宦以郎督清源儲盡刻積弊却羨金歸之公帑大司農張公檄獎以為庶僚風且將一進之而翁以元城公夫婦荷覃恩贈於榮親之志醉矣未報之恩未究之蘊有伯子在遂飄然解組歸玉峯翛然塵壒之外矣顧翁雖倦勤于國乎乃退而行其德於鄉先宗黨次周親又次鄰里不能葬者棺不能婚者幣不能衣食者粟布大侵而貿貿然來者粥蓋凶年而所奪諸溝

壑者不啻千也邑志故脫畧諾邑大夫之請而新之善善惡惡詳詳畧畧傳為信史而其城邑城也則以石州之變倡諸縉紳士庶而以身始終之者言言佻佻遂為三晉巖邑云居恒晏息團焦日與耆舊相過從蒼顏皓髮望之若仙課子孫曾玄以耕讀之業而加之以謙虛長厚之旨即病將易箆猶周族之孤弱百金蓋好施自天性云歲己卯進封翁官如伯子又十三年為萬曆壬辰以二月六日終于正寢距生正德庚午九月初二日享年八

十有三配張恭人同邑處士某女自歸翁不及事姑而樊宜人來稱姑又祖姑宋在堂也恭人婉孌事之偏得重闡懽拮据昕夕不以獨賢言勸比從宦南北服飾布素不以榮顯為華既諸子昂貴中外孫曾滿前持門內益兢兢中程不以豐盛易素風用能上佐封翁助和陽清源之政下開伯子成衡鑑綏靖之勲儷之太冲翁真所謂維德之行者矣先翁十九年卒距生正德癸酉壽六十有二公丈夫子五長即中丞公由丙辰進士累今官娶鄭

繼張次應龍散官兩娶皆韓氏次應兆臨洮判府
娶衛繼李沈次應庚金吾衛指揮娶南繼李又次
應麟邑庠生娶韓繼郭女子子一應芳適庠生劉
承光孫男十一曰承寵庠生娶李繼劉承賜平陽
衛鎮撫娶張繼韓承命舉人娶徐繼張承忠庠生
娶陳繼石俱應槐出承誥娶商承眷娶王應龍出
承蔭聘商應兆出承宋聘趙承憲聘王承宁承宇
未聘應麟出孫女十二適劉承勛王學詩王學禮
字盧學孔鄭以忠李生藩韓接祖李養相餘幼未

字曾孫九曰淑元娶柳先公四年卒淑愷娶商淑
稷聘王淑尹聘商承寵出淑夔淑益承賜出淑周
淑說承忠出淑契承誥出曾孫女三一 字張五典
一尚幼承賜出一字商新民承忠出玄孫一曰家
昌淑愷出嗚呼晉氏子孫繩繩繼繼蟬聯鳳起太
冲翁之遺蔭未可量哉翁于家為孝子于國為名
宦于里為仁人于邑城為義士于邑乘為良史壽
踰耄耋孫見曾玄于食報為全福乘化歸順何遺
憾耶余不能史謹據公大節俾中丞刻而納諸壙

中而系之銘曰

經言五福翁履其完傳言不朽翁會其三冲而用之不竭如泉凝之維人篤之自天揚城之墟鬱鬱芊芊是為城城者太冲大夫之阡侶彼穆姜同此歸全以千萬年如壙不騫

劉封君墓誌銘

代家君作

嘉靖中余游郡庠以姻故識雙橋劉翁于同舍豐髯廣頰頎然玉立偉丈夫也同舍生徃徃詠于思譚之翁第笑應時即心慕翁長者曰是安所得此

汪汪千頃叔度陂已知為南庵李公高弟益心服翁能篤信師說而謹守之以為是非常人進且未可量顧翁數竒屢上有司不見推擇家復當中落之後時以朝夕為二尊人憂翁竊念古之學期于有用柰何以無用累吾學吾且近而試用之家于是讀且耕田輒歲穰翁喟然曰吾致精于學而無年吾嘗試于農而有年命矣命矣會翁長子有聲膠庠間次子韶秀穎異所授即解遂謝去博士籍一意南畝以上奉二尊人養而下資兩子學穗菘

日廣家日益饒而兩子業亦日隆隆起人無不為
翁羨富盛而翁視之若無有已次子乙酉舉于鄉
丙戌成進士入讀中秘書擢拾遺青瑣翁且由儒
行准 勅賜冠服晉封右諫議至貴倨矣人無不
為翁羨顯融而翁視之若固有第時時詒書次子
勉以務正學以言暨舉先正司馬文正公務利國
家而不為身謀之語以申迪于宦邸也御臧獲日
加嚴遇鄰比日加洽待姻戚日加任卹有設酒召
無不徃徃無不盡懽者有以困告無不周者有以

田宅急抵無不委曲昂直副其須者有挾勢而凌
有佯酒而侮有卑屬而市辱無不怡然受漠然若
不聞也者少嘗有所貸已償矣猶終身佩之不忘
及施于人率委之若棄蓋身所焚券以十數人無
不多翁長者能折節忍詢重義而不知翁自其天
性及體認師授而非有意于酌盈也翁嘗以所聞
于南庵者轉授里中務先器識後文藝里中間謂
翁迂及其督課兩子始終不逾此兩言至跡翁素
履不啻若實其言者而次子竟用翁訓致通顯稱

名諫議安得謂迂也歲庚申市有合抱木鬻翁視之魁然爪其膚栗然心識其梗楠也傾囊中粟并范孺人簪珥易之已太夫人大故盛暑中拊身無憾人以為純孝所致及太翁之終戚易燕至里中稱善居喪云翁素善飲服勤日治家人生產以佐次子都諫君廉辛卯秋忽食不噍壬辰稍減七筭癸巳正月疾進都諫君冒考功法請急歸侍湯藥餘十日翁第時時執手囑以恪守司馬公格言以利國家而修職業至二月初六日遂不起矣嗚呼

人之涉世徃徃務恣睢以鬪捷不則且億逆以術明抑或構煽以毀成或懷伎以殖利或陰持以乘危甚且旁齟以自封謠詠以尊已而恒恐不勝也翁不立城府不為町畦不擇橫逆不幸顛危不利不義獨能不疾不徐以振前之微而啓後之緒坦洞木訥以御衆之巧而定俗之劇其讀且耕而穰也其得大木而預也其行不于身而子也與其田而蝗蝗而穰穰而蝗辟不為菑也蓋畸于人而侔于天者其終致顯盛子姓繁茂宜矣余與翁少相

習晚同社而翁兩子復皆從余游蓋交于翁父子
間最深翁之歿也都諫君以杜虞部之狀稱治命
來徵銘余義不得辭按狀翁名某字某雙橋其別
號也生正德庚辰四月十八日亥時卒萬曆癸巳
二月初六日戌時壽七十有四配范前亳州守賜
之姪陝西憲副克濁之姑貴族也翁數稱其婦道
母儀內助弘多封孺人子二長為霖州學生先公
十年卒娶趙氏次即都諫君為楫官刑科都給事
中娶李氏繼尚氏贈封皆孺人孫男六兩子各三
孫女四兩子各二曾孫男一名弟娶嫁狀備矣以
卒之年某月某日葬某村之某方若干里戴某履
某蓋新阡也銘曰

學南庵兮得其宗恢前模兮乃肯堂仁心篤行老
彌豐虛游無物柴其中猗與萬石聲隆隆千秋百
世真此宮

楊貳府墓誌銘代家君作

歲丁亥八月里中傳固安楊貳府公三臺交薦爭
豔稱之蓋公由任子歷今官前此已十三薦故也

居無何或言公不祿殊不謂然已公弟孝廉君以書并狀來徵銘則公定死矣嗟嗟文章勝而世及之途輕南北分而北人之仕厄固天運然哉何自並長算而斬之也按狀公諱文禕字美叔別號中庵太史方城先生第三子也家世具方城先生傳中公生而穎異對客屬句每驚其座人在鯉庭與仲兄孝廉君文譽相埒顧屢上京兆試不利丁卯莊皇帝錄勲舊公以次任入太學今上乙亥就吏部銓授都察院照磨公箕裘世業夙諳朝省掌故

兼之雍容文雅御史大夫獻縣臨川兩陳公咸深加器重一時冠豸乘駄之彥亦莫不改節下之戊寅擢丞上林上林主 上供珍膳諸璫盤據其中號為提督者益沐猴而冠往時丞並緣漁嚙因折節若下走公一切以禮法相枝柱而大者在釐正蕃育署牛稅歸之計曹計曹歲贏上供千金而商民所省更不啻倍苑中僚屬望之會前白罷其提督大璫于是貪者忌其介孱者害其能合助諸璫排而公遂出判濟南矣公履濟南任受署均田田

井井就緒部內稱平上官大誥曰是婉婉名家駒也何所辨為老吏若是因時時使攝屬邑新城淄川章丘泰安之政不吐不茹推強懷弱閭閻默畝與其賢士大夫之口同而兼併之豪已耽耽側目乙酉夏轉今官既上即假守延見吏民耳行聽受口行問對手行注擬所當無不心服它罷疑獄往往移就公決兩造在庭一言而折日十數讞不假遽廬接浙行矣古稱案無滯牘庭無留獄庶幾近之哉附庸職貢之入即庭命其賦長持衡要以中

程而止莞庫無所高下其手一郡大悅服丙戌大計吏淄川豪飛語入都屬大冢宰北海楊公雅知公而藩臬守相復力白枉狀廷中更益賢之充既大郡事煩公又精意民事不敢以假守故秦越視之兼之鄰質交投過賓狎至署事兩暮常以旦日受牒夕日聽訟乙夜治爰書猶恒以稽務妨民為歉積勞而病尋苦帶下竟以是捐館舍蓋八月九日也詎生嘉靖己亥七月初一日得年四十有九耳公天性孝友居方城先生喪絕不御酒肉歲時

上食依依孺子泣也已推方城先生意割上產以
為祭田事母祖夫人色養備至異母兄弟好惡與
同姻族鄉鄰以公待匱與人交披襟出懷洞然坦
然以此人人自不忍欺而東郡士民間公之喪無
不號泣願代則推誠之效可觀已夫始忌者之中
公而外之將以困之也顧公之才以歷郡而始著
既怨者之螫公于大計固將甘心焉而公之賢以
衆口而益彰然公能柔內璫之悞而不能枉忌者
之口能使螫者不為害而不能使年所之久延昔

人有言祝有益也詛亦有損豈一二之詛乃亦勝
聊攝以西汶泗以東之祝耶則所云仕之不世及
而文章也盛之不壯而南也蓋天實為之矣嗚呼
天則為之人其謂何哉公配通州馬氏贈安人內
行純懿先公十五年卒得年三十有二繼宛平孔
氏封安人男子子四長宸學聘余弟女未娶而殤
次宁學憲學寓學俱幼女子子五文安庠生王弘
祚同邑庠生劉人淳監生張汝謨其壻也二尚幼
以卒之十一月十一日祔葬方城先生之域與馬

安人合焉公姻於余弟余從余弟習公并習公弟
孝廉裕文學裨科咸彬彬篤行士也惇史有徵孝
廉之狀不溢美是足不朽矣因不辭而為之銘
貞之無報也孰是人斯而遭斯造也抗議而勝攝
理而能遇多口而亨而年以不羸是夫才合於誠
實浮於名而德不酬以齡者耶鬱鬱九京太史之
從屹屹堅珉司馬勒銘藏之玄宮百世其徵

王考功鷓適軒文集卷之四

益津王樂善存初甫著

伯子伯鏞大聲甫

門人于成龍雲從甫同校

祭文

祭陳太守乃翁文

北海之波浩漾粘天百川共委岱宗累魁含吐網
緼露雷渟起海涵其靈嶽毓其秀篤生君子君子
伊何抱樸含淳于莒之里潛德含章洞無町畦其

旋視履神姿塵外爽度霞表汰粃揚滓望侶太丘
門擬高陽里如畏壘太和之積結為大年衍為元
凱學懋誕登行成不肅猶勤章軌蜚聲藝苑奮迹
賢科策名 丹宸作牧神臯訓遵餽鮓風高酌水
民飢民溺我子我疇拮据胼胝侯日兢兢曰惟嚴
命愛民守已祥召兩岐謠興五袴化行馴雉譽騰
熊軾望重 楓宸為三輔式政牘聞翁擁褐含菽
怡然色喜謂伺乃橐杓然故書庶無慚爾不有若
翁焉取若子鬱哉濟美飲醇之民飽翁歲貽願翁

壽豈因岱為俎酌海為尊繫翁永茫胡天不吊翁
不愁留遽沉濛汜翁棄郡侯侯遂余去于何依倚
哲萎莫追寇借無由云如何里兩地纏哀詎止家
艱實邦之否嗚呼太虛聚散為冰為水奚彼奚此
無始不終有少必老晦明定理惟賢惟德不生而
彰不沒而毀身享遐齡備膺五福庶云繁祉子著
清德篤生益光亦曰靡悔鄉有榮名 朝有褒綸
國有惇史為龍為光為瑞為楷翁于何痾某等併
懽詰嗣惠日和風日游華胥彥詠義方遙承休蔭

翹然心企方慶春暉遽埋瓊樹悲何能已地阻瞻
楸情乖執紼瞻言陳誅有酒非清有俎非馨惟靈
鑒止

祭蔣鳳洲憲伯

嗚呼古今號廉能吏者不乏矣大都自多其長而
惡人之軋已又徃徃多所縱舍以釣平名不則鴟
張毛鷲貽藉不然之灰剝剝匿市之猾聊以示威
已耳咄咄彼生於近名之心成於擇利之智以此
速化可也汶汶而生泯泯而沒其鬼不靈何德之

稱乎公之建節而來不為一切懸鈴建鼓之術惟
日循循焉討十三城之銅墨而殿最之于時余郡
守莒陳君者良以廉平樸茂故官及暮而不獲上
公按得狀力為推轂陳君遂浹月而薦者三至非
公成美施名則一陳君耳庸庸於前而卓犖於後
何能頓爾也黠民依城社凌弱豪兒以睚眦椎埋
公一切麗情抵法游揚百端搖撼四出公屹然不
撓單門寒士塵里細氓則撫摩慰藉不辭煩瑣至
欲借顏一申其喙則舌柱口噤而不得通雖頗以

此得冷面稱然有識者必以此益重公不府怨也
潞却之役供張輿馬水陸調發旁午不腆散賦
以公指減 景却之賦十五大璫不饜公寧躬自
暴立水濱公不難旬日攬秘之勤而父子夫婦免
疇昔分袂向隅之悲公之造如天之造也郡都受
水委比歲川祗少戢羯羗之衆相胥狎之丁亥水
民與鳧雁爭半菽以生徂春陳守議葺坊公悉裒
贖鍰為儼民不知役而數十里堂堂如也束矢之
入不循例達朱門而破格施白屋公之拙也此足

以觀矣凡此四者皆巧宦所不肯為亦人之所不
能為而公獨卓然為之大都曲撫困窮而不阿意
通顯厚施無告而不隆遇要津彼以俗眼視公以
俗套求公則夫憚其嚴不便其直目為板笑謂迂
者悠悠風塵何足計哉初公拜遼左之命郡人喜
公之擢感公之去而未嘗不冀公之將復填撫我
無庸借也而今已矣既公有請玦之舉歸途且道
下邑郡人日夜引領熊軾庶幾信宿望見顏色而
今亦已矣嗚呼橋運難知修短有數有虞氏之聖

而帝也終於蒼梧朱仲卿之賢而令也葬於桐鄉
寇平仲之賢而相也貶死海康大丈夫四海為家
太宇為室乘化委順豈必煦嫗就含兒女子手乃
稱校哉公抱希舜之志負平仲之節而有仲卿之
惠益津即僻陋公桐鄉也又奚以迢迢旅櫬孤燈
總幃為公恨耶乃若所恨使公由此游登三事以
達陳守者達天下之廉能以法一道者法天下之
奸橫以節一事者節天下之浮冗以利一方者利
天下之顛危而俱不得遂以此為宗社恨耳其
等辱公部中親炙公之丰采渥受公之帡幪而不
意公之遽反真宅也如哀銜恤詎直等於輟相下
機之儔哉生芻絮酒用申祖饋蕪詞寫哀惟靈其
昭鑒之

會祭崔司訓文

嗚呼皇運載否嶽泐梁摧哲人就木孰嗣緇帷鱣
堂雲沍絳帳塵迷僚友填邑門墻銜悲噫嘻傷哉
蕩蕩渤澥磊磊碣石哲人挺生祥發慶積英標山
立博識海闢秘抉五車名高三益涵泳聖涯邁種

前迹羽秉先登講推重席橫鶯詞場千人辟易班
升宗伯畿鐸簡借正色臯比節解有若啓此玄扃
劓彼堅白盜盎春風融融靈液于行有方在言無
擇寧獨禮齊亦惟身式教洽化成聲稱赫奕褒檄
紛馳顯擢行及一疾陟嬰崦嵫遂迫孰意斯人遽
逢斯厄噫嘻傷哉踽踽弟子玆玆孤遺迢迢異國
獵獵素旗悽悽嚶鳴哀哀薤詩雙輜東首行路歔
歔某等與霑教澤欣奉光儀曰子曰弟是穀是移
殘膏剩馥私慶師資而今已矣雪涕循題悵惟玄
論從此長離素車白馬薄送臨歧何以抒忱有孚
者卮何以寫心不腆者詞悠悠祖饋神其鑒思

同門會祭沈先生文

嗚呼哀哉吾師乎吾師乎竟止是而已乎世之人
固有椎魯無文杖杜不辨而獵纓轂者矣亦有鉗
忌自恣濃澁無藉而享頑福者矣此無足論已漢
廷公卿多用明經發身平津丞相亦以高科裕昆
建武太傅祗以飭行見尊先生于斯非不足者業
紹雕龍學探理窟研洙泗之微言破縹緗之大軌

經不啻明也翼奮秋雲名高藝苑衰然南省之英
蔚為北州之冠科不啻高也矯矯清修蒸蒸溫厚
體若不勝乎衣言若不出諸口行不啻飭也然起
家進士筮仕銅墨再起再仆飄然健翮在先生雖
視之裕如然酌德一何畲也仕絕苞苴居謝請謁
拮据朝夕不加故業在先生雖處之泊如然養德
一何薄也少事二人不逮三釜有淑好逑中道長
徂此固先生之所終慕而深念顧遭際一何楚也
嗚呼哀哉舉先生之道術無一類之可訾疏先生

之素履無一日之可怡謂天無意文胡在茲謂天
有意困胡若斯仲尼子輿蓋亦如之永念先生涕
其隕而嗚呼哀哉孽興二豎妖兆兩楹山頽梁壞
騎箕為星里歌輟響巷杵收聲嗚呼哀哉濟濟即
君蜚聲鄉校或始垂髫或尚襁抱烝烝無依行路
嗟悼嗚呼哀哉國喪冠冕鄉失典刑音容永闕泉
戶長扃不俱往者戶服遺經嗚呼哀哉先生雖上
厄於天命而實下孚於人情雖終窮於兼善而寔
取羸於道明况即君彬彬乎日上又何必自身而

大行儻間里皆遵聞而獲當於世用抑孰非先生
之令名視彼微倖一時之榮寵而存歿無關於桑
梓者果孰失孰困而孰亨某等闕黨小子蓬藿後
生執經函丈深荷陶鎔無叩不竭有藏必傾循循
之誘恩等生成瞻依門墻庶幾有興而今已矣天
乎天乎胡不俾我厠杏壇之琴瑟而俾我薦素帷
之豆登胡不俾我從舞雩之杖屨而俾我待蜃軼
之丹旌胡不俾我持觴上南山之祝而俾我歌楚
些而失聲日月可繪此德難名山川可銷此恨難
窮傳心有典請益無從澗毛豆實椒醕卮盈即欲
先生強起一嗅而不得又焉知涕泗汎瀾而露纓
長跪嗽辭聊寫哀衷先生在上尚其鑒歎

同門會祭賈先生文

瞻彼燕山鬱從隆些臨睨渤澥淼無窮些先生篤
生山海中些高朗道上山比崧些汪洋博大海同
容些蹈貞履素見直躬些恬風靖節凜固窮些循
循雅化不肅成些鄉國瞻依埒林宗些秉羽詞壇
擅宗工些閎深奧衍文中龍些涵泳聖涯誕先登

些闡繹帝學來遠朋些後進誦法等扶風些起家
胃監試哦松些佩牛捐刃耻怙終些肺石大畏自
無訟些誠民平政以禮成些府主坐嘯喜雍容些
介山之政儷仲弓些芳聲茂實隆隆興些旌書啓
事紛來宗些登庸真拜旦夕逢些尊鱸繫思懷舊
邦些舉楫急流追冥鴻些歸來下澤樂融融些青
瞳玄髮顏如童些繞膝森森寶樹蔥些期頤共卜
謂尚弘些詎意真檻踐天夢些嗚呼乘化歸盡人
之恒些朝聞夕隕沒稱寧些矧茲上壽又何恫些

嗚呼題奏既肅寒燠載逝波不回棠陰難曙爰
啓殯階言歸玄域覆輜庭引丹旒首路去遽廬而
永捐指松楸而長驚颺羽葆于悲風咽邊簫于殯
露淒朱明以慘沮結愁雲而靄沍某等人地闕黨
材質互鄉挹清江漢就曜秋陽循循之誘恩等生
成瞻依朝夕庶幾成章而今已矣天乎天乎胡不
俾我侍杏壇之琴瑟而俾我奏素幄之大房胡不
俾我從舞雩之杖屨而俾我瞻蜃軌之禪旁胡不
俾我常奉農山之色笑而俾我相向于泗上之場

山石可泐大造難忘滄流可田此恨無疆敬修祖
饋忱寄一觴言不悉心神其鑒饗

祭姜封君

睠軒轅之故疆兮維幽陵之南垂滹沱淼以經
帶兮金沙盤紆而崔嵬帝烈山之苗裔兮迄弘正
而祥發靈誕降而不遲兮益好修而不替裳變荷
而佩蘅蒨兮杜德機于衡門滋蘭桂於庭階兮結
竇氏之芳鄰嚳享紛總總其克紹兮伯先翱翔夫
天路稱循良于營丘之墟兮入司九乾之耳目匡

拂上嘉於宸衷兮渥寵推厥自開惠文冠而豸
繡錫兮刈穫惟其所裁朝晞髮于蘭皋兮夕徜徉
乎瑤之圃里庚桑之畏壘兮名太丘而為伍寒燠
歷以七十換兮更四帝而化之稱堯舜之外臣兮
揖巢由而亞之洵令惠之孔章兮固不啻結纓冕
也重龍縛之褒與兮芳菲菲其彌闡也信姱施不
於躬兮竟于子而取償寶樹矧蠹蠹焉日上兮餘
慶固悠悠乎未央謂將洗髓玄而摩踵青兮為熙
朝之上瑞義馭忽其不淹兮俄及于崦嵫而頓轡

睇穹昊之茫茫兮原隰慘而寥寥愁雲凝而靄靄
兮霏雪霰之漂漂儼雙輻之載駕兮行將即夫玄
域悵泉戶之長扃兮傷令子之樂棘某等忝生同
此里聞兮惜顏笑之未承也顧聆芳澤于下風兮
高山仰而景行行也嗟靈輻之大歸兮豈異情而
不悼竊托交于柱史兮言執紼于祖道精薌奠以
為烝兮薦蕙俎與桂卮依巫咸之遺則兮跪敷衽
而嗽詞邈光景之無儀兮怛恍惚其焉極忤欵
余鬱邑兮哀一見而不得望旒旗而涕洟兮莽浩
浩而興喟蹇義問之在人兮固歷千禩其不昧靈
脩然而陟帝鄉兮珥雲軫而載降眷容與以臨睨
兮庶鑒鄙懷之懍懍

祭苗太翁文

峩峩燕山泱泱易水聚秀鍾靈篤生君子憲皇彰
軌孝廟迪彛君子好修厥有其遺孝弟力田隱德
弗耀抱素含淳履和觀妙里如畏壘名亞太丘神
相人助薦祐凝休顯不于躬取償于後翩翩孝廉
鬱為國秀詞場橫鶩藝苑名高衆推嚆矢獨抗前

茅妙簡賢書行題淡墨 鳳誥龍綸佇及翁側色
養方渥食報未央胡厭塵溷遽游帝鄉眉壽考終
雖云大息敘我典刑寧無傷盡還真返始雖云固
然孝思罔極其何以堪萬鍾鼎來而翁不待興言
及茲恫然增慨人望攸屬而翁不居追慕徒寄憐
焉以嗟某等里閭後生通家小子托交孝廉竊聆
緒旨期願共祝孰意長違痛心酸鼻異况同悲靈
馭不留倏焉歲改言念音徽怵憚莫解崇肴涕酒
以馮我心在上者靈盈缶者忱

會祭劉封君雙翁

維總玄之為嶽趾崑崙而蜿蜒繫溟渤之為水苞
元化而揚瀾海嶽委其靈淑鍾奧區而生賢將啓
後以發祥肇純德以開先凝冲粹以葆真超恒習
以達觀味四聖之真腴紹南庵之心傳起逢掖以
亢宗排儔伍而高騫佩明月而琚璐又懷蒞而握
荃慨齟齬于齊門益勵志于河干抗義方于喆享
鳳雙舉其翩翩仲覽德于阿閣歷青瑣而昌言發
寶藏于海岱補帝堯之爛斑振直聲于丹陛揚教

采于清班舉象賢之秉正悉庭訓之克虔 帝嘉
仲之不績爰崇報而 恩覃渙溫褒于紫誥錫章
服以如璫翁承寵兮若驚齒彌劬而彌謙法偃倭
于正考思約素于嚴延耕無畔而不讓面無唾以
不乾教益飭于門內情更渥于窮簷開白社以燕
喜樂情話之蕩綿春風噫其嬰色秋月耀其華巔
偉衣冠以出游撫春醪而盤桓既健七而不杖望
者豔其真仙卜食報之未央曹共期以彭錢胡一
疾之隄被歷三時而迤邐仲驚心于楹臂倏請急

而籲天天為翁而卑聽遂循陔以承懽曾娛侍之
幾何去鼎養而長捐悵推梁與頽嶽孰後進兮指
南維淳龐之獨厚既體備而歸全暨懿行之表表
可敦薄而廉頑凡芳摸與積慶是皆翁之六年某
等托葭莩之末屬廁詰嗣之雞壇夙仰風而私淑
間接膝而承顏悵音徽之永違傷高躅之難攀恨
遠羈而莫赴慘異况而同樂遙寄忱于單詞酌盈
缶之漿蘭靈剡剡而來格鑒愚衷之惓惓

又祭劉太翁文

嗟翁之質其完太素之純白而璞太乙之鴻蒙者
耶抑保合太和而盎若春融者耶嗟翁之德其坦
夷冲粹颯颯乎泛蕙之光風耶抑溫而栗縝而澤
瑟瑟乎吐氣若白虹者耶嗟翁之度其為谿為谷
汪汪於扶桑之東者耶抑蕩蕩乎一任夫塵埃野
馬之相盪相摩若寥廓之秋空耶嗟翁之學其篤
信謹守步步趨趨味四聖而洞玄扃者耶抑開關
啓鑰以不用為用若溟渤之含滋孕秀蒸雲霧而
起蛟龍者耶嗟翁之壽其和五平七政虛守靜葆

玄默而執環中者耶抑乘化往來委順去留齊畫
夜而友喬松者耶嗟翁之福固仰幾大耋卑視素
封里以善頌嗣以賢名而大命考終者耶抑厚植
薄享方興未艾卷懷造化若時冬月晦而化化無
窮者耶嗚呼擬之八音翁則黃鍾譬言之運世翁則
蕤農固宜結為香山之壽豈煥為 楓陛之褒封
發為象賢之讜論衍為奕葉之繩繩七十四載飄
然長往其悟幻空耶醒塵夢耶抑解弢墮袞去坳
壑超汗漫而入於無始無終耶將乘白雲馭玄鶴

洪崖倥傯乎追踪耶曾是不意德門昂祚胡違此
愍凶耶天不憖遺耆碩凋謝後進其胡所宗耶玄
冥紀候川原愁沍彼與素旒丹旒同其凄慘者草
木冰耶茂華之姻金蘭之契懷仁慕義之衆胡不
蘭蒸桂醑觴公於榮壽之宇而素車白馬送翁於
東郊之玄宮耶黃壤不春音徽永怆能無悵疇昔
情話之從頌耶臨風一奠長跼陳詞可勝余懷之
懔懔耶

祭劉僉憲羽東親家

代家君

猗與憲伯邦家之光發祥華裔篤慶承芳淵渟嶽
峙玉質金相造深濶洛業富縹緗詞林虎變雲路
龍驤起家郡理問淑刑平風清雀鼠春盜析楊化
成弼教謠播蟹匡分闡顓俊鑒徹驪黃入佐棘寺
益慎愈章趾臯步呂躋于度張明允之譽欽企巖
廊維 帝北顧拊髀于襄刑之大者繫公肅將桓
桓虎節赫赫臺綱翩翩鳥隼轟轟神羊輶軒絜令
董正四方雲中井絡統萬名疆兩河之會四牡彭
彭籌紆叔度馭叱王陽轡澄灑餐筆掃撓槍既踏

賀蘭亦比甘棠政參綽猷壯金湯有軫必任無
繁不嘗盤根錯節督力方剛望隆旄鉞伐炳旂常
躊躇滿志善息而藏辭榮鵷列比迹鴻翔怡神西
疇寄傲南窓花明白社柳湛陶觴杜門却軌三徑
徜徉春融謝砌教肅十郎穀詒類錫穎脫虞庠含
飴履順真樂洋洋養高崇厚身隱名彰閭式過賓
風聳南床隆中之吟磻溪之璜令名耆德屢賁飛
章佇朋三壽如陵如岡云何不吊沚起膏肓共企
蜂車胡即黃腸咸云未艾胡止杖鄉龍耶蛇耶以

為公祥天乎人乎而俾公亡其長泰一日進獵前
行關中之役辱贊勳勅受成畫諾歛衽明揚予既
東路公亦辭梁重以冢孫鳳卜謬當匹劉歎范偶
謝慚王笑語周旋十五星霜情話方洽遽爾參商
昔接杯斝今撫禪傍衣冠徒陳音容渺茫氣苑如
嗚涕雪其滂暮春之朔日吉時良玉靈襲吉言即
玄堂題奏既肅蜃軌嚴裝素旒丹旒慘黯青陽嚶
嚶大鳥蕭蕭白楊遣車輾輓駕駟徬徨哀縈里巷
悼惻倪龐矧在婚姻忍臨公喪質言寫慟侑以椒

粲靈其不昧鑿此辨香

祭紀食憲豫吾親家

先民有言仁者必壽人亦咸云賢者有後古或不
雙言今乃愈謬伊誰實然氣化紛糅為畷為豐惟其
所遵曰正曰反匪常斯寃哀哉紀君胡為薄祐君
之自出華腴名胄爰自曾高世傳紱紱逮君之身
益昌愈茂婉婉七龍君也獨右四聖心契六藉芳
漱杏苑夙登華原羽筵貫索即星光燭盆覆青瑣
錦心上補袞繡洛黨造孽大難是購嶽嶽中流伊

誰能嗾外補是甘忍誣中菁身冠朝拜南陔夕奏
曾是尊鱸睠言錦畫三膳躬調百順祇聚承懽無
幾倏焉在疚少連居喪適追來孝彰美傳盛事長
撫幼何有伺無以待來扣爰室爰家式恢爾舊聿
隆孔懷弼成肯構通德閱高畏壘望懋拔薤抱嬰
干旄樂就化裨鳴絃惠流圭竇依泳德園逍遙文
囿乘邑傳信庶窺班雷留其書五車著綴日富伯玉
知非伏湛不闕閱歷漸深韜養滋厚未見其止徒
瞻其秀嗚呼哀哉若華方升濛汜遽遷向累半畢

總悵俄懸二豎為祥五禽無權一疾陟被百瘵不
蠲彌天鴻抱戢以一棺孰是彭門下壽猶慳孰為
畢呂而未華嶺胡縱之才胡奪之年胡發之早胡
促之還既限其算復斬其傳曾不愍遺俾守遺編
人也阻德天亦降殘幾同若教行路辛酸幸君同
氣為君周旋憐此奄奄排彼眴眴擇于當繼爰立
孤孫樹長匪私舍姪非嫌兩發相依德耀是安邦
君蒞之衆筆如山漫置終悔諒不其然君之蒸膾
由此綿綿君而聞此含笑九泉某于君家世忝姻
連雅敦故好復媾新懽分憂共戚一體無間當君
早世意反梯仙暨君折嗣深慨無天伏聞義繼稍
慰哀顏承祀有人乃啟玄宮時維新卜兆仍舊阡
門戒雙轡庭肅祖筵方春發生品彙咸鮮悵茲塵
玉寧不凄潛哀哉紀君與世長捐涕酒陳詞以寫
鬱悃靈而不昧鑒此惓惓

會祭劉肖岩會長

嗚呼哀哉劉君胡為遽至此耶康衢未竟濠記奄
迫難謀我夢夢者天耶將芳蕙易摧慶雲易散大

造固有所難全耶抑和沴糾紛常變錯午適值夫
 橋運之偶然者耶人龍不居嚶鳴中絕其等其情
 何以堪耶憶昔與君接迹而與君時文譽業已隆
 隆仲君和之人嘖高閉君不滿假曰畏後生傾蓋
 莫逆斷金惠盟左提右挈剖素抒誠同好棄過啓
 曠發蒙沃我醇醪坐我春風聚樂之義洩洩融融
 方珠斯貫比嶽尊嵩而今已矣嗚呼哀哉以君之
 抱一第何有以君之衷百祿宜受以君之量百年
 非偶何壬午文戰霜蹄忽躓令女告殤復推詰厚

莊盆繼鼓賈鵬旋至悲夫悲夫胡達以才胡厄之
 遇胡厚以德胡薄之祚胡縱中涵胡嗇前路嗚呼
 哀哉皤皤二人待君而崇鞞鞞棠枝後君偕榮娥
 娥虞侍望君以忻婉婉雙雛仰君有成惇惇石交
 籍君斯礪百未一酬溘焉上征悲夫悲夫老親單
 弟弱妾稚子哀動行道惻纏媼里踽踽友生慟何
 能已嗚呼哀哉盍簪投分義重久要蘭襟暫判昔
 歎鬼銷矧茲長離下壽未超玄論不再靈魄莫招
 芸帷寂寂雞壇寥寥愁雲慘色木響哀條悲夫悲

夫孰播大鈞而奪予哲孰薄予緣而令躬子豈乏
 代興而誰君埒言念微猷慕深情結擬續楚些我
 心如噎枚淚矢言聊申永訣亦有椒漿不覩君噉
 嗚呼哀哉

祭王母吳太夫人文 代家葬

天將佑國家之治而厝之平則必篤生名世之賢
 以維其運天將生名世之賢以大其用則必先生
 聖善之母以發其祥天既為國家一代之治生賢
 母而開其先則必為國家一代之治豐賢母之祚

而隆其報是故虞之隆也以簡狄啓契商之興也
 以空桑氏毓伊顧阿衡侑食大饗而空桑氏之褒
 命莫傳簡狄生貴高辛而瑤池之仙籍無述至上
 元夫人南岳魏元君仙矣而人爵之融顯不聞寰
 中榮遇方外竒逢固若是之罕備也維夫人之生
 以思齊思媚之德作配 贈公以光啓我荆石相
 公弼亮鴻猷斟酌元氣以匡輔萬曆安攘之治是
 夫人之生非為太原氏而生為我 皇明無疆祚
 而生也且人之有母而人壽之也不過繪西王母

之圖稱蟠桃閭風之故事而悲其歿也亦不過曰
乘三素雲躋極樂國然摠之祝願冀望之詞非有
實事維夫人有女孫身證上真為夫人下南海西
池諸聖介紹而見之且斟天漿以沃夫人而夫人
之登遐也 聖天子至親灑 宸翰一曰仙逝二
曰仙逝夫 天子為天地人神之主上下萬靈咸
聽命焉則 帝命曰仙即真仙矣是簡狄空桑氏
之所不能得者而夫人以一身肩之也是列真之
所不能兼者而夫人以一身會之也餘如夫君之

同登耆壽兩子之並列元魁孫枝之繼美魏科

帝眷之鼎來 楓陛與夫四方之謳歌哀誄在他

人為竒事者在夫人皆恒事在他人為最盛者在
夫人皆末節耳豈 上帝以夫人之德音淑行曠

世未有元嗣相公之德業亦曠世未有故舉振古
所無之福澤以報夫人耶夫人翬舉上真應皆喜
得仙侶夫人棄養邦國固皆悼失女宗夫人之生
天下咸蒙其休夫人之歿天下寧不共茹其戚某
不似昔謬握兵食之算侍夫人元嗣相公于 朝

而相公之奉夫人歸里也 不肖豚犬 其實承命
攝紀綱之僕 獲從夫人 冢孫解元君起居 夫人聞
茲長訣 可勝淒其嗚呼 代謝晦明 天地定理 簡狄
空桑上元 南岳皆乘化來往 然往者往矣 而不往
者亘古今如一息也 夫人生前榮遇 身後竒逢 人
世無兩 今且仙仙乎 御女孫而逍遙乎 瑤池也 陟
降而臨睨 舊邦尚其歆 兩世通家者之將乎哉

祭楊母祖夫人文

繫母氏之昭懿兮 祥發於慶都之鄉 和淑蒸于朗
靈兮 德曜葆乎瑤光 夫豈獨姪以練要兮 蘅茝紈
其芬芳 既琢琬琰以爲衷兮 又綴明月以爲璫 際
靈荃之嘉止兮 羗維德以偕行 詠雞鳴以申戒兮
內則信其明章 備禘禘於魚菽兮 精五飯於肅將
荃下木天而歷試兮 必內莞以承襄 夫懸魚以見
操兮 配執績以持盈 肆德業以好友而益懋兮 用
永譽於東方 心誠求於鞠子兮 闡徧覆於在桑 衍
螽斯之蟄蟄兮 覃和德以致祥 詰享紛總總 其林
立兮 麗邁種於高陽 肆靈源之浩淼兮 用篤祐於

宗祊荃倏焉忽其不居兮姬煦而代終乎義方章
軌而熊丸以申之兮曰好修以為常鴻嗷嗷以上
征兮龍蜿蜿而駢驥文苑郁其蜚英兮亦趾美於
侯邦肆家聲隆隆日熾兮用錫慶於肯堂被翟榆
而蒞之兮娛鼎食而樂康 天載錫以純嘏兮

帝崇報以龍章宗姓依其婉孌兮絢菜綵之踉蹌
逾稀年而壽豈兮永萱日於載陽極生人之榮致
兮介景福咸曰未央胡昊天之不吊兮沉望舒於
西崦萎女宗於鄉國兮驚兩髦之右袒將招三素

於若華兮侶金母遊于閨苑抑播運有固然兮乘
大化而還反嗟寒暑之定理兮即女華所不免也
矧逾耄而望耄兮邀齡固匪曰短也備四德而貞
履兮垂徽音而稱聖善也歛五福而得全兮于人
心夫何憾也惟懿範之永湮兮縹冥冥兮不屬慘
象服之虛陳兮栝捲羅而弗顧大行黻黻以凝愁
兮長河吞聲而東注百卉薶靡其銜恤兮風木哀
號于廣路某等同太史之故都兮兼葭蘿之竊附
仰孟里之芳躅兮識期頤之非富胡寶婺聞其睟

霏兮悵摧衷於來訃恫怵憚余歎歎兮空託悰於
 扱慕四序忽其不居兮清霜凝而氣烈感成功之
 退息兮悼棘人之緡結指誰噬而驚心兮臂為痛
 而孰搯曾祿來而孰養兮潘輿懸而孰悅精瓊庶
 以為糒兮沛椒漿之有飶跪敷衽以陳辭兮意欲
 申而哽饑靈乘雲而下來兮風雨旗之獵獵寒沼
 沚之匪馨兮庶其鑒愚忱而昭格

祭蹇母王夫人文

滔滔大江南國之紀包荆滙吳欲喻彭蠡古今稱
 天塹焉委潤流滋弘濟無量然柴望沉瘞之典不
 于荆吳彭蠡之間而于大岷乎走集則以苞靈孕
 秀非此莫啓弘源也夫人含井絡之英鍾大岷之
 粹淑儀自出南平望宗德音來括三巴冠族襟帶
 華腴而服儉衷勤佩德珥禮既以鷄鳴雜佩之儆
 戒相臬憲翁德業于前後以丸熊躬績之箴規成
 司馬公德業于後夫曰拔葵配兮裳布子焉酌水
 母也返蚶詐代終之好述殆于良友固啓後之益
 母允副嚴師玉儀芳聞型于宗姻播於鄰黨四方

縉紳韋布托交于司馬若屬在部中者莫不向風
襲馥望月晞光于司馬之廸教陳常循循善誘而
識夫人徽柔思媚之美于司馬公之詰戎貞度桓
桓綏靖而識夫人敬戒思齊之休于司馬公之于
蕃為憲赫赫身真長城而識夫人貞靜秉成之似
也龍綸之錫母儀婦德 聖天子悉簡知而亟稱
之若曰是國之女宗宜尊禮以風壺中維陰教也
譬之大岷之巍峩奠于坤維屹然常靜而大江渾
淪洋溢沛然流滋委潤天塹乎南北之間也崇本

報功 國有常秩恩褒鼎養何福不自求耶且壽
康偕于君子壽星同寶婺交光餘慶鍾于孫枝玉
樹與萱花競秀蟒綉班斲翟禕增耀生人之榮致
何以尚茲夫人以壽豈安司馬于疆場司馬因以
燕喜專精神于捷伐是夫人之身 宗社之所倚
庇而區宇之所忻懽也鶴鬢方輝雲輶促駕潘輿
甫導娥馭倏遷司馬以夫人故將辭齋壇之鉞遂
令中外以夫人故失巨川之舟淳風載瀉闡儀什
表皇稜未墜名世輟籌岷岳推峰靈源奚托靡依

何恃寧獨司馬之戚已耶耄齡非短考終已祥塋
 護司空吊出宗伯里掇相謠家傳令則韶儀慶澤
 垂施無窮夫人自有百世不朽者在矣惟 宗社
 無疆惟司馬之勲伐無疆惟夫人之功用亦無疆
 乘化往來大鈞常運一觴寄真夫人其含笑歆嘉
 之哉

祭固安傅母文

嗟夫世人有言內德不踰閭故易著無成詩稱無
 儀以為固然然孟子輿之母梁伯鸞之妻無論流

稱當時即今去之千百載猶頌說艷慕不置乃知
 德患不修無有有德而不昭著洋溢者也弟伯鸞
 之妻稱儷美矣而後之融顯無聞子輿之母傳厚
 喪矣而國之褒崇則缺蓋得全若斯之難也太安
 人賢擬舉案慈等三遷邦仰女宗家傳內範板輿
 就養則潘太君遜其樂康 鳳綉褒封則懷清臺
 讓其萃律既已作型桑梓陰翊化基而其篤生太
 僕公也復以丸熊却鮓夾輔曲成而太僕公因祇
 服懿訓以經營四方在西秦為循令尹在中臺為

名御史在曹司為名光祿名冏卿凡此徽猷皆由
令則太安人蓋又有大功于宗社矣安在內德
不踰闕無成無儀耶乃太僕公之祿養方隆而金
母之青鳥亟召遂令太僕公以太安人故而亟返
馴兔枯栢之廬國家且以太安人故而遲覩安
內攘外之績某等為為鄉邦失女範悼耶為為太
僕公抱終天之恨悼耶為為蒼生不即沐太安人
之遺澤悼耶為為雞絮酒惟以告哀不腆之謂太安
人其昭鑒之

祭刁母張節婦

嗚呼程嬰杵臼之義奕世頌之至列之秩宗與古
先聖哲帝王等豈非以立孤存趙偉烈與日月爭
光耶至閨閣之彥禮稱精五飯幕酒漿養姑舅縫
衣裳以為此之謂婦職而已清心玉映代不乏媛
孰有女而士行如太安人者耶始終晝夜雖有定
紀大德必壽實亦常理彼蠢而壽悍而福者何限
也孰謂有女而士行如太安人者而遽止此耶太
安人之歸昭信君婉孌而承敬戒而相此婦順之

常人所可及也惟昭信之棄賓客堂有髦尊門無
血胤刁宗岌乎朝露此而申匹婦之諒表狗死之
貞安人何難辨此而悼往念來圖終忍死三月而
獲竹居君以續刁氏百世不拔之宗托慈復于熊
丸抗義方于榎楚三十年而竹居君以材武起家
于中行佐舉嬰杵所相遜以為難者太安人從容
就之太安人之德于刁氏不與古任姒諸淑聖比
隆哉色養方隆 褒封可俟而委順乘化溘焉上
征豈其力能延刁氏百世之宗而顧不能祈一身

期頤之筭德能乎令子顧化之速而反不能介厥
躬疇離之祉耶將感應靡常稔沴交錯適值夫天
之未定者耶抑修短有數匪夷可易一本于敷錫
之固然者耶其亦厭世溷濁乘彼白雲侶金母携
天人為瑤池閨苑之游者耶或前豐則後齏抑此
必伸彼其又將歛一身之福極以貽刁氏之詰享
耶聿昌厥後寔克代終歸報昭信相視一祭安人
其怡然泉室耶而 朝有旌綸國徵惇史家承內
則里述女宗安人不又有雖沒猶存者耶電火之

軀百年為長令名懿德天壤同修其等于太安人
夫復何憾耶第辱與竹居君游于太安人有通家
之誼感此永訣寧不分憂及覩大遷愴神塵玉一
觴申奠聊將追慕之悰惟靈其昭鑒之

祭紀親家母李安人

嗚呼哀哉孺人遽止是耶善不必祥仁不必壽秋
實行薦而樹者不一享蒼蒼者胡為此膏膏耶國
失女宗家亡內範姻如雪涕紅女下機于孺人竟
何贖耶孺人自出瀛海望宗德音來括京兆冠族

百兩迎將衿帶華腴而珥德佩禮禱儉服勤拮据
內政以相夫子雞鳴儆業雜佩贊德寧獨良友允
稱賢助矣且婉婉孝敬順于姑焯友睦惠和宜于
娣姒任血慈仁施于姻媿逮及于臧獲內外子姓
依依幾無常母視我伯母李夫人之懿範有光無
不及焉無祿亡妹昔幸雁行稱娣孺人憫其不及
事姑而憐其遠父母兄弟也收恤指誨宛如手足
惟是藐焉弱息因得侍孺人仲子以事孺人孺人
復以念亡妹故推分子畜弱息也昊天不吊弱息

奉槃承事不及四暮而孺人溘焉棄養矣長君孤遺娟娟韶秀鳳彩方苞仲子纍纍宅憂頭角欲奮愛女煢煢日夕形影相吊由此而成立而進取而孺人俱不及見也夫君懷瑜握瑾待價清時軋軋機聲故與伊吾共曙乃顯融在卽而孺人復不待也熊丸徒苦手澤虛存牛衣誰箴墨帳孰示月慘城烏塵湮鸞鑑茹荼銜毒慟如之何嗚呼靜好之瑟化為鼓盆斑衣之侍易而素韞含飴之權變而含襲幡勝之遺更而繇賻靈萱方茂倏貫夏霜皓

娥就中間虛俄值孰為女偶而游夜臺孰是金石而慳中壽豈豐畷遞倚其將歛一身之福極以裨夫若子孫耶抑韶儀玉德流馥無窮自有百世不朽者耶文伯之母樂正之妻以至孟德耀桓少君今皆焉在而亦何嘗不在安在其為內德不踰閭身沒名不章耶某廁在世姻于孺人推分若嫂銜悲抱戚寧異封胡羯末等耶涕酒崇肴用申祖饋惟靈其昭鑒之

首七祭亡室文

嗟夫子之棄人世也七日矣昔嘗日詢翁起居日侍姑色笑而今皆不與知矣三子二女昔嘗恐其不和不學慮其有病有憂而今皆不能顧矣門內室內昔嘗圖其缺乏節其出入而今皆不復為余檢矣始之望子助我扶持老親而番令二親哭子廿五年未嘗一言忤我而一旦以未了之諸累貽我方履亨途遽成永訣福薄緣淺命實為之嗚呼哀哉悲何益矣

再祭亡室文 五七

子之去人世也今忽又五七矣四十三年涉世何促三十五日過隙何速精爽神氣杳焉何之孤燈素帷徒有哀男弱女形影相吊也疴疹疾痛控告無人子而無知則子安而生者苦子而有知則子之刺心酸臆不百倍生者哉子嘗以命任諸天以子女任諸我嗚呼我實有子女而令子刺心酸臆於冥冥中哉

三祭亡室文遺奠

嗚呼人神異道日月不居為子卜宅既定行將窆

子昔也周旋室堂今也委諸草野白楊風雨黃昏
魁魁有知耶無知耶嗚呼已矣形為桎梏命實主
張子解天弢我猶火宅今夕何夕乃與子訣嗚呼
哀哉

程